

# STARFSLEYFI

## fyrir vinnslu brotamálma hjá Íslenska stálfélaginu hf., Hafnarfirði.

### 1. Almenn ákvæði.

- 1.1. Starfsleyfi fyrirtækisins er með tvennum hætti, A. fyrir málmtætara og forvinnslu brotamálma, og B. fyrir málmbræðslu. Starfsleyfi þetta gildir fyrir málmtætara.
- 1.2. Skylt er að sjá um, að á öllu athafnasvæðinu sé gætt fyllsta hreinlætis, eftir því sem kostur er á og umhverfið sé snyrtilegt.
- 1.3. Um varnir gegn skaðlegum áhrifum á starfsmenn og starfsumhverfi fer samkvæmt lögum nr. 46/1980 um aðbúnað, hollustuhætti og öryggi á vinnustöðum.
- 1.4. Mengunarvarnir Hollustuverndar ríkisins geta, að höfðu samráði við Heilbrigðisráð Hafnarfjarðar, lagt til við heilbrigðis- og tryggingamálaráðherra, að starfsleyfið verði endurskoðað, ef í ljós kemur hætta á skaðlegum áhrifum á heilsufar almennings eða vegna röskunar lífríkis.

### 2. Varnir gegn mengun umhverfis.

- 2.1. Fjarlægja skal alla vökva, þ.e. olíur úr girkössum, vélum og þrýstikerfum ásamt vökva úr kælikerfum bifreiða og úr eldsneytistönkum áður en vinnsla fer fram í málmtætara. Vökva þessa skal endurnýta eftir því sem kostur er á en að öðrum kosti farga á viðeigandi hátt. Einnig skal fjarlægja alla rafgeyma úr bifreiðum áður en til vinnslu kemur og koma þeim í endurvinnslu. Ákvæði þetta gildir fyrir allar vélar og tæki sem til vinnslu fara í málmtætaranum. Ef tæming fer fram á athafnasvæðinu skal hún framkvæmd á steypu undirlagi og með þeim búnaði sem fullnægjandi er talinn að mati Hollustuverndar ríkisins. Olfuskilja skal vera á fráveitu frá svæðinu.
- 2.2. Úr öllum hvítvörum (kæli- og ísskápum) skal fjarlægja allt freon og setja á þar til gerð ílát og í endurvinnslu.
- 2.3. Áður en stærri rafspennar eða þéttar fara til vinnslu skal gengið úr skugga um að slíkur búnaður innihaldi ekki PCB, það sé gert með sýnatöku sem Hollustuvernd ríkisins eða annar aðili sem viðurkenndur er af Hollustuvernd ríkisins annast. Ef kælivökvi slíkra tækja inniheldur meira en 50 ppm af PCB er vinnsla búnaðarins óheimil og ber að farga honum samkvæmt fyrirmælum Hollustuverndar ríkisins. Ef grunur er á að PCB sé í rafþéttum eða spennum í hvítvörum skal þeim fargað samkvæmt fyrirmælum Hollustuverndar ríkisins.
- 2.4. Opin brennsla er óheimil á athafnasvæðinu.
- 2.5. Eftirfarandi hávaðatakmarkanir gilda fyrir starfseminna:  
Að degi til kl. 7.00 – 18.00 55 dB (A)  
Að kvöldi til kl. 18.00 – 23.00 50 dB (A)  
Að nóttu til kl. 23.00 – 7.00 45 dB (A)  
Meðaltalshávaði (Leq), mælt við næstu íbúðarbyggð, skal ekki mælast hærri í 90% tilfella, miðað við hverja klukkustund og aðeins mælt þegar vindhraði er í 10 metra hæð minni en 5 metrar á sekúndu. Hávaði frá starfseminni skal ekki mælast hærri en 70 dB(A) við lóðamörk næstu byggðu lóða.  
Innan þriggja mánaða frá útgáfu starfsleyfis þessa fari fram hávaðamælingar, sem Hollustuvernd ríkisins annast.
- 2.6. Aukaafurðir sem koma frá málmtætaranum, plastefni, gúmmí, trefjaefni, gler ofl. skulu látin í gáma. Koma skal þessum efnum til endurvinnslu eftir því sem kostur er á. Önnur förgun skal fara fram á sorphaugum.

- 2.7. Ryk úr útblæstri skal hreinsa, þannig að ekki sé meira ryk en 100 mg/Nm<sup>3</sup> að hreinsun lokinni, miðað við eðlilegt loftmagn frá slíkri starfsemi.
- 2.8. Vatn sem notað er til þvotta í hreinsibúnaði skal vera í lokaðri hringrás. Úrgangsefni úr vatni þessu, og ryk úr hreinsibúnaði, skal fjarlægja reglulega og farga samkvæmt fyrirmælum Hollustuverndar ríkisins sem metur förgunaraðferð í samræmi við niðurstöður mælinga með tilliti til efnainnihalds úrgangsins.
- 2.9. Málmtætarinn skal standa á titringsdeyfandi undirstöðum og steypu plani. Fráveita skal útbúin olíugildru.
- 2.10. Sérstök öryggisgirðing skal vera umhverfis athafnasvæðið.
- 2.11. Úrgangur (fok o.fl.), sem kann að berast útfyrir athafnasvæðið skal hreinsa upp reglulega.
- 2.12. Leiðbeiningaskiltum skal koma upp þar sem opnunartímar eru kynntir og hvar losun mismunandi hráefna fer fram.
- 2.13. Á hverri vinnuvakt skal vera vaktstjóri sem hefur góða þekkingu á öllum búnaði, hér með talið skráningu upplýsinga, virkni hreinsibúnaðar ásamt þekkingu á ákvæðum starfsleyfis þessa.

### 3. Eftirlit og gjaldskylda.

- 3.1. Starfsemi Íslenska stálfélagsins fellur í fyrsta gjaldskrárflokk skv. viðauka 8 í mengunarnavareglugerð nr. 386/1989. Gjald þetta skal standa undir kostnaði við sérhæft eftirlit Hollustuverndar ríkisins, sbr. þriðja kafla reglugerðarinnar. Fyrirtækið skal jafnframt þessu, í samráði við Hollustuvernd ríkisins, gera mánaðarlegar mælingar á ryki í skorsteini og seti úr vatnshreinsibúnaði. Niðurstöður skulu sendast Hollustuvernd ríkisins á sex mánaða fresti.

### 4. Gildistaka.

- 4.1. Starfsleyfi þetta, sem veitt er í samræmi við gr. 8.4. reglugerðar nr. 386/1989, um starfsleyfi fyrir atvinnurekstur sem getur haft í för með sér mengun, sem sett er með stoð í 3. gr. laga nr. 81/1988, um hollustuhætti og heilbrigðiseftirlit, öðlast gildi við birtingu.

*Umhverfissráðuneytið, 5. júní 1990.*

**Júlíus Sólnes.**

*Páll Líndal.*

## REGLUGERÐ

### um menntun, réttindi og skyldur aðstoðarmanna tannlækna.

#### 1. gr.

Rétt til þess að kalla sig aðstoðarmann tannlæknis og starfa sem slíkur hefur sá einn, sem til þess hefur leyfi heilbrigðismálaráðherra.

#### 2. gr.

Leyfi samkvæmt 1. gr. skal veita þeim íslenskum ríkisborgurum, sem lokið hafa námi, sem viðurkennt er af heilbrigðisráðherra. Leita skal umsagnar landlæknis áður en leyfi er veitt.